



SAKSFRAMLEGG

Sakshandsamar: Arnved Soldal Lund	Arkivkode: FA-D11
Arkivsaksnr: 15/24	Løpenr: 16/7885
Sakstype: Politisk sak	

SAKSGANG			
Styre, utval, komité m.m.	Møtedato	Saksnr.	Saksbeh.
Formannskapet	20.10.2016	048/16	ASL

HAGABOTNANE IDRETTSANLEGG - VAL AV DEKKE I HALVSIRKEL OG FINANISERING

Rådmannen sitt framlegg til vedtak:

Det vert lagt drensasfalt med eit tynt kunststoffdekke i halvsirkelen for å letta vedlikehaldsarbeidet og det vil og gjera at anlegget framstår som meir heilskapleg. Med dette dekke vil ein kunne tilby ein stad til uorganisert aktivitet som tennis og ulike ballaktivitetar.

Kostnaden vert finansiert av restmidlar i prosjektet og ved å omdisponera midlar sett av til ungdomsaktivitet i Sima-Samnanger-fondet.

20.10.2016 FORMANNSKAPET

Handsaming i møtet:

Utvalet drøfta rådmannen sitt framlegg og ønska å erstatte densasfalt med kunststoffdekke med kunstgrasdekke. Finansiering av meirkostnaden vart drøfta og Monica Tjønnå (Sp) sette fram følgjande tilleggsframlegg:

«Meirkostnaden samanlikna med drensasfalt med å få fullverdig kunstgrasdekke i eine halvsirkelen, vert finansiert som gåve frå Samnanger Fotball, med makspris på kr. 100.000.»

Det vart røysta over tilleggsframlegget, som vart samrøystes vedteke.

Formannskapet vedtek å nytta hasteparagrafen til å finansiera kunstgrasdekket inntil kr. 352.158,-, jf Kommunelova §13.

Melding om vedtak gjort i medhold av denne paragraf skal verte lagt føre kommunestyret i neste møte.

Eit samrøysta formannskap slutta seg til å bruke hasteparagrafen.

FORM-048/16 VEDTAK:

1. Det vert lagt kunstgrasdekke i den eine halvsirkelen. Kostnaden vert finansiert av restmidlar i prosjektet og ved å omdisponera midlar sett av til ungdomsaktivitet i Sima-Samnanger-fondet. Til saman kr. 352.158.
2. Meirkostnaden samanlikna med drensasfalt for å få fullverdig kunstgrasdekke i eine halvsirkelen, vert finansiert som gåve frå Samnanger Fotball, med makspris på kr. 100.000.

Formannskapet vedtek å nytta hasteparagrafen, jf Kommunelova §13.

Melding om vedtak gjort i medhold av denne paragraf skal verte lagt føre kommunestyret i neste møte.

Dokument som er vedlagt:

Kunstgrasbane - statusrapport

Kva saka gjeld:

I den eine halvsirkelen i det nye anlegget i Hagabotnane er det planlagt grus. Det har kome innspel frå Samnanger idrettslag i prosessen med planlegginga av anlegget om mogeleg bruk av arealet, det har òg kome innspel frå fridretten i Hordaland, Teknisk driftseining og kommunestyrerepresentant Martin Haugen (BI) i kommunestyret 29.9.16

I det anlegget som vart bestilt, så er det planlagt grus i den eine halvsirkelen. Den økonomiske ramma for anlegget var kr 8 100 000 og anlegget som er bestilt kostar kr 7 911 455. Ved bygging av idrettsanlegg kan me søke om spelemidlar, og det vil me gjera med dette anlegget. Av den økonomiske ramma for prosjektet er det ein kommunal del på kr 4 200 000.

Me har bestilt dei tre opsjonane som er omtalt i notatet, korkgranulat, to ekstra løpebanar, ein sektor med kunststoffdekke til tekniske øvingar i fridrett. Nettokostnaden for dei tre tillegg er på omtrent kr 520 000. Me har i tillegg satt av inntil kr 100 000 til innkjøp av nødvendig vedlikehaldsutstyr og kr 200 000 til uføresette utgifter. Med reknestykket sett opp i notatet, skal det då vera kr 100 000 igjen i prosjektet.

Vurderingar og konsekvensar:

Rådmannen er ikkje ueinig at det bør vera eit anna dekke enn grus i halvsirkelen. Dersom det ligg grus der, så vil det verta trekt med inn både på løpebanen og fotballbanen. Det kan gjera at slitasjen vert større og at det trengs meir vedlikehald.

I tillegg til å lette vedlikehaldsarbeidet vil eit anna dekke enn grus føra til auka aktivitet.

Arealet det er snakk om er på 1 177 m², forma som ein halvsirkel. Det er i utgangspunktet eit areal det er vanskeleg å nytta til konkurranseidrett anna enn friidrett. I eit tradisjonelt friidrettsanlegg ville det arealet vorte nytta til kasteøvingane. Dei har me valt bort ettersom me skal leggja kunstgras, og fordi me ikkje har lagt inn eit kastebur i prosjektet. Kasteøvingane kan gjerast på

grusbanen. Me har ikkje eit behov for å leggja til rette for kasteøvingane ved det nye anlegget. Arealet kan nyttast til anna aktivitet.

Det er ein økonomisk kostnad med å leggja eit fast dekke i halvsirkelen. Det er avhengig av kva for eit dekke som vert valt. Dei ulike moglegheitene er lista nedanfor.

1. Asfalt
2. Asfalt med tynt dekke med kunststoffdekke
3. Kunststoffdekke med kulesektor
4. Kunstgras
5. Ikkje gjera noko

1. Drensasfalt

Asfalt er den rimelegaste løysinga dersom det skal gjerast noko. Det vil då verta lagt drensasfalt for å sikra at vatn trekk ned i grunnen. Prisen for asfalt er omtrent kr 250 per m², kr 294 250 ekskl. mva.

Med asfalt slepp me at det kjem grus i løpebanen og fotballbanen. I tillegg kan arealet nyttast til aktivitet. Det er få idrettar som nyttar asfalt som underlag, men det er mogeleg å nytte arealet til idrettsleg aktivitet eller leik.

Pris er estimert til underkant av kr 300 000 ekskl. mva.

2. Drensasfalt med tynt kunststoffdekke

Ein vil leggja drensasfalt for avrenning av vatn og spraye på eit tynt lag med kunststoffdekke. Kunststoffdekket vil ikkje tilfredsstilla dei krava som friidretten stiller til underlag for konkurranse. Arealet kan framleis i hovudsak nyttast til idrettsleg aktivitet og leik, men det vil vera eit betre underlag å gjera det på. I tillegg vil anlegget vera meir estetisk å sjå på. Ein vil få same farge på underlaget i begge halvsirklane.

Pris er kr 352 158 ekskl. mva.

3. Kunststoffdekke med kulesektor

I eit tradisjonelt friidrettsanlegg ville denne halvsirkelen vorte nytta til kasteøvingane. Me har på eit tidleg tidspunkt valt bort kasteøvingane med å leggja kunstgras på fotballdelen. Spyd, slegge og diskos vil øydelegge kunstgraset i tillegg til at det er få utøvarar som driv med det. Dersom det skal gjennomførast kasteøvingar, så kan det gjerast på grusbanen. Me har heller ikkje planlagt å sette opp eit kastebur.

Me kan vert lagt inn ein sektor for kule i halvsirkelen, men kule kan òg utøvast på grusbanen. For kule er det ikkje eit krav om kunststoffdekke.

Dersom det leggjast kunststoffdekke i halvsirkelen får me eit dekke som kan nyttast til trening og konkurranse for friidretten, men me kan òg sjå for oss andre aktiviteter idrettslege aktivitetar og leik. Kunststoffdekket vil vera mjukare enn asfalt med eit tynt dekke.

Pris er kr 611 098 ekskl. mva

4. Kunstgras

Fotballgruppa i Samnanger idrettslag har spelt inn kunstgras tidleg og seint i prosessen, og kommunestyrerepresentant Martin Haugen (BI) har kome med innspel om kunstgras i kommunestyret den 29. september 2016.

Å leggja kunstgras i halvsirkelen har tidlegare vorte avvist grunna at det vert ei utfordring med drenering. Måten banen vert bygd opp på, gjer at grunnen under kunstgraset vert tørt. Det vert lagt ein tett duk imellom og vatnet vert leda ut i dreneringsrør i ytterkant av kunstgraset.

Dette lar seg ikkje gjera i halvsirkelen. Halvsirklane skal byggast opp utan fall på grunn av krav i friidretten. Kunstgraset må leggjast med at dreneringa går ned i grunnen. Me har tidlegare vurdert massane under grasbanen til å vera tilfredsstillande, men for å vera sikre må masane på denne delen skiftast ut.

Dersom det vert lagt kunstgras der kan me sjå for oss at det er fotball som er den dominerande aktiviteten.

Pris er kr 455 341 ekskl. mva

5. Ikkje gjera noko

Arealet vil ikkje kunne nyttast til anna enn leik og det vil kome grus inn på kunstgrasbana og løpebanene.

Ingen kostnad.

Det er to hovudaktiviteter på det nye anlegget. Fotball og friidrett, og begge idrettane kan nytte seg av arealet. Fotballgruppa ynskjer kunstgras. Dei meiner at det kan leggjast ei 3'er-bane der. Ei 3'er-bane vert nytta av utøvarar under sju år i kamp. Ved å leggja kunstgras så får fotballen litt meir treningsareal.

Den anbefalte speleflata for 3'er-fotball er 10 m x 15 m, og med tryggleikssoner på 3 m vert den totale arealbruken 234 m². Halvsirkelen har eit areal på 1177 m².

Med å bytte ut grasbana med ein kunstgrasbane så vert brukstida auka frå 150 timar i året til inntil 2 000 timar. Det er ei auke på 5 timar kvar dag heile året. I tillegg har me òg ein grusbane med inntil 2 000 brukstimar i året ved sidan av. Kunstgrasbana får ei speleflate på 6 400 m² og grusbana har eit areal på 6 000 m². Det totale arealet sett av til fotball vert 12 400 m².

Samnanger idrettslag hadde i 2015 14 fotballag med omtrent 145 aktive utøvarar. I 2016 sesongen er den største banestørrelsen dei nyttar 9'er. Ein 9'er-bane er den nest største banestørrelsen. Til ein 9'er-bane kan ein nytta den eine halvsida av fotballbanene, eller frå sekstenmeter til sekstenmeter.

Rådmannen meiner at behovet til fotballen vert oppfylt av grusbanen og den planlagde kunstgrasbanen.

Som nemnt tidlegare så vert dette arealet nytta til kasteøvingane i friidrett. Dei må gjerast på grusbanen. Rådmannen meiner at friidretten ikkje har behov for arealet.

Frå ein idrettsfagleg ståstad er det best med kunststoffdekke, men at arealet vert nytta til anna aktivitet enn friidrett. Det kan til dømes vera tennis, volleyball, bordtennis eller eit leikeareal. Dersom det vert lagt kunstgras i halvsirkelen, så vil fotballen nytta arealet til organisert aktivitet. Ved å leggja eit kunststoffdekke, og leggja til rette for anna aktivitet, så vil me leggja til rette for meir uorganisert eller eigenorganisert aktivitet.

Å driva med idrett og fysisk aktivitet har ein eigenverdi for den enkelte. Dei føler glede med aktivitet, og det er det som er drivkrafta. For Samnanger kommune har idrett og fysisk aktivitet ein

nytteverdi. Å vera i god fysisk form påverkar helsa til den enkelte positivt, og ei frisk befolkning er Samnanger kommune tent med.

Å leggja kunststoffdekke i halvsirkelen er det dyraste alternativet, og på grunn av det vil ikkje rådmannen anbefala det. Den økonomiske situasjonen til Samnanger kommune gjer at me må vurdere kva kostnad dei ulike alternativa har.

Finansieringshøve vårt er å nytta dei midla som er igjen i prosjektramma, og å omdisponera midlar frå Sima-Samnanger-fondet vårt. Der er det satt av kr 756 477 til ungdomsarbeid som ikkje er bunde opp i økonomiplanen.

Å nytta midlar som er satt av til ungdomsarbeid kan forsvarast med at idrett først og fremst er ein barne- og ungdomsaktivitet. Det er flest barn og unge som er aktive utøvarar i idretten. Med det nye anlegget vil deira høve til fritidsaktivitet vera god.

Med bakgrunn i den økonomiske situasjonen og at fotballen og friidretten sine behov er godt nok ivaretatt, så foreslår rådmannen at me vel å leggja drengasfalt for å letta vedlikehaldsarbeidet og eit tynt kunststoffdekke for det estetiske. Dette dekket kan òg nyttast til uorganisert aktivitet. Det vert finansiert av restmidlar i prosjektet og å omdisponera midlar satt av til ungdomsaktivitet i Sima-Samnanger-fondet.